

Estamos na Ferrería  
os rapaces de Marcón  
pra ensinarvos este maio  
que este ano ven protestón.

Todo o ano a chover  
despois de tanta sequía.  
O diluvio non foi nada...  
van más de corenta días!

Pra que pare de chover  
xa din os nosos veciños:  
-Santa Clara está valeira,  
onde levar os oviños?

Se sube a electricidade  
dinnos que é por non chover.  
Co que choveu este ano  
vainos saír a devolver.

Fai pouco veu o Rajoy  
ver a nosa autovía.  
Debía de traer medo,  
trouxo moita policía.

Non sei de que tiña medo,  
se ten medo non é bo  
igual viña "acjonado"  
por se levaba outro ostión.

Ai! E para recibilo  
a el a á súa comitiva...  
Que pedazo invernadoiro  
lle montaron alá arriba!

Tamén foi o señor Lores  
debeu chegar mareado  
sube lombo baixa lombo  
como na noria montado.

O alumeadoo de Nadal  
este ano foi moi fulero  
igual para o ano que ven  
alumean cun chisqueiro.

Nunca houbera tanta xente  
a mirar o alumeadoo  
sen gastar tantos cartiños  
tiñan o centro petado.

Espero que non gastaran  
moito en iluminación  
o alumeadoo funcionaba  
un día si e outro non

Tampouco os composteiros  
algúns din que moito cheiran  
ademas de criar ratas,  
¡que os poña César na eira!

No verán ardeu o monte,  
o da Xunta ten delito.  
É peor que a gasolina  
esta praga de eucaliptos.

A "estratexia" forestal  
desta Xunta non convence.  
Non terá nada que ver  
o amiguismo con ENCE?

Ante a crise da enerxía  
os políticos "amables"  
van e en vez de potenciais  
chapodan as renovables.

Infinitos imputados  
en casos de corrupción.  
Do continente europeo  
niso somos campións.

A que nos tomen por parvos  
estamos acostumados.  
Escándalos un tras outro...  
Xa estamos anestesiados!

A mafia está no goberno,  
o sistema está ben podre,  
danlle ós ricos a mancheas  
o que nos rouban ós pobres.

Miles de millóns de euros  
dos que a banca perdeu  
agora non llos reclaman...  
-A esta convidó eu!

Para dárille ós banqueiros  
para aí sobran millóns  
pero non pra garantir  
o sistema de pensións.

Saen con forza a protestar  
pensionistas e anciáns  
mentres tanto a xuventude  
está coa play a xogar.

Debe ser que somos parvos  
ou que temos pouca vista...  
recortan en sanidade  
e rescatan autopistas.



Recórtannos os dereitos  
e quítannos o que é noso.  
Se levantara cabeza  
Franco estaría orgulloso.

Se te metes co goberno  
censúranche “enseguidiña”  
ben sexa unha exposición  
ou o libro de Fariña.

Fariña que tanto gusta  
ós que están nos altos cargos  
e non queren que se saiba  
que son amigos dos narcos.

E a carallada da Gürtel  
évos un bo culebrón.  
Quen será o M. Rajoy?  
Misterio sen solución!

E con estas testemuñas...  
é que así non hai maneira!  
Aparecen “suicidados”  
ou caen polas escaleiras.

E a folga das mulleres  
foi un feito extraordinario  
deixándolle claro ó mundo  
que teñen un par de ovarios.

Cando entre todas se xuntan  
o machismo está acabado.  
A ver se pronto conseguem  
rematar co patriarcado.

Calquera debate político  
neste país é en vano,  
aquí o único debate  
é se Messi ou se Cristiano.

E se protestas por algo  
ou de Franco fas un chiste  
podes ter moitos problemas  
áinda que sexa por Twitter.

Muito peor se te metes  
coa familia Borbón,  
coma Hasel ou Valtonyc  
pro cárcere do tirón.

Se te vas facer un “selfie”  
ten coidado, ponlle coto,  
non che vaia vir Letizia  
e che arruine a foto.

Pois menuda situación,  
que tensión hai, “mi madriña”!  
Non hai boa relación,  
seica hai pique entre as raíñas.

No goberno hai xente lista  
máis ben lista demais  
aproban cursos e masters  
sen pola clase pasar

Para poder ter un máster  
traballiño que me dou  
e a outros coma Cifuentes  
na tómbara lle tocou.

Seica agora os cataláns  
quérense marchar de España...  
Vendo como está o patio,  
a verdade, non me estraña.

Agora fálase moito  
dun tal Carles Puigdemont,  
non lle chega a autonomía,  
el quería unha nación.

Algúns foron pro caldeiro  
e o Puigdemont escapou  
e por terras de Bruxelas  
o tipiño se exiliou.

Na escena internacional  
métennos medo a moreas  
tódalas televisións  
coa bomba de Corea.

Pero más ca Kim Jong-un  
a min moito más me espanta  
o rubito millonario  
que vive na Casa Blanca.

E xa imos rematando  
que imos ó Corte Inglés  
hoxe firma o Rector Masters  
e só está de dez a tres.

